butin de animali. *Item*, mandano una relation, come i nimici sono in campo, fanti spagnoli . . . . , todeschi . . . . , lanze spagnole . . . . , e zanetieri 1000, pezi di artelarie . . . . . *Item*, certissimo le zente dil Papa è andate a Verona.

Di Friul, fono letere di sier Marco da Pexaro provedador di Cividal, di 27. Come i nimici si aproximono a la terra, et quelli dentro ussiteno fuora, preso do bandiere etc., e altre particularità, sicome più copioso scriverò di soto; e todeschi vanno brusando per tutto e le biave e teritorii.

Di Udene, dil locotenente, letere di 27, con avisi ut supra, e relatione, qual scriverò copioso poi.

Fo leto una relatione di le raine di Napoli *olim* zonte a Loreto, e l'onor fatoli, et aspetavano do cardinali che dovea venir da Fiorenza de li; con altri avisi di le cose di Roma e parole dite per il Papa.

Di Padoa, dil capitanio zeneral fo letere drizate ai Cai di X, in risposta di quanto li fo scripto, dicendo non è stà vero l'aviso dato, perochè lì a le Brentelle sta con guardia, et le zente nostre è ben in hordine, excepto vi è pochi cavali lizieri.

La terra sta mal di peste. È morto sier Piero Magno qu. sier Stefano da peste, e in varie contrade pizega. Si fa le provision si pol; *tamen* ne muor 5 et 6 al zorno.

Da poi disnar, fo Gran Consejo. Fato governador a la Zefalonia sier Valerio Marzello, fo podestà e capitanio a Ruigo, et Io el tulsi; fui in eletione e cambiai per Pregadi et tulsi sier Antonio Sanudo, fo ai X savii mio fradello, et rimase.

Fu posto, per i consieri, tre parte, una di le qual fu presa in Pregadi, videlicet di levar le voxe si feva per scurtinio; la copia sarà qui avanti. Ave 123 di no, e fu presa. Item, fu posto che sier Andrea Griti procurator, eleto capitanio zeneral di mar e non arma, possi esser electo, e fu presa. Item, fu posto certa parte de' incendii di Rialto, che le scriture si possi relevar, ut in ea; etiam fu presa. La parte dil Griti ave 61 di no, 408 de sì la prima volta, perchè non fu balotata. La seconda 134 di no, 1027 de si, e fu presa.

2 A dì 30. La matina el Principe non fu in Colegio: pur sta bene, ma per la doja non pol caminar si non con crozole; si veste e sta sentado in la sua camera.

Di Padoa, zoè di campo, di le Brentelle, dil capitanio zeneral, di eri. Come è zonti in campo de i nimici cara 150 di vituarie venute di Verona: i qual inimici sono pur a le Torete, stanno streti. L'altro zorne, li nostri cavali lizieri fono fin sopra li stechadi, et loro non si mosseno; dieno levarsi certo, non si sa per dove. Alcuni dicono andar a Olmo e li star, per esser loco più comodo a loro aver vituarie.

Di Friul, fo letere, di 28, prima di Cividal di la Comunità una letera. Come è fidelissimi e si hanno ben portato contra i nimici, quali erano da 8000 etc., ut in litteris.

Di sier Zuan Vituri provedador zeneral di Cividal. Come le zente nostre erano rimaste a Predoman vicino a Udene; e prima mandoe in Cividal 250 fanti soto do contestabeli, Hironimo Fateinanzi e Alfonxo da Pisa. Item, poi lui intrò dentro, et i nimici si erano retrati et andati verso Cremons; judica voglino tornar a Gorizia. Scriveno altre particularità, come dirò di soto.

Di sier Vicenzo Capello provedador di l' armada, da Lignan. Come è li con la galia bastarda Contarina e sier Tomà Moro capitanio di l'armata menuta con le fuste e barche longe e altro, e la Signoria comandi quello l'habi a far, perchè star li lui non pol molto; è bon vadi altrove e la galia Contarina vengi a cambiar la galia. Maran è stà fornito di presidio e vituarie etc.

Di Roma, fo letere, questa matina, dil Lando orator nostro, di 27, et letere di Franza, di 24, da . . . . . , le qual fo lecte con li Cai di X. In conclusion, si sta ad aspetar quello sarà di l'acordo de Ingaltera, e si tien seguirà ad ogni modo; nè altri fo dito.

Di sier Vetor Lippomano vidi letere, di Roma, di 27. Come la cossa di Siena di la parte foraussita di Belandi, che voleano intrar e cazar Petruzi, non have effecto, perchè in Siena era domino Borgese Petruzi ben fornito et si prevalse virilmente et rebatè li inimici; etiam il Papa li mandò ajuto per via di Fiorenza etc. Scrive esser morto il Grasso di Medici . . . . . . . Item, il Papa à fato uno altro governador di Roma; sichè il vescovo di Trevixo, che era, non sarà più.

Item, è letere di Franza, di 20. Come il zeneral di Normandia, ch' era zonto in Ingaltera, à 'uto audientia dal Re; e tratando di far acordo tra quelli do reali, il Re dimandò a Franza ducati un milion e mezo e tre terre, zoè Teorana, Bologna e San Quintin, et che il dito zeneral disse: « Questo non è acordo, ma il mio Re farà pace insieme e vi darà il censo consueto ». E che quel Re disse: « Hor s' il vuol mia sorela per moglie, che fo mojer dil re di Scozia, l' acordo sarà facto »; unde dito zeneral spazò in Franza; sichè al re di Franza sta a far le noze e l' acordo, e si tien omnino seguirà.